

**INKULUMO KANGQONGQOSHE WEZOKUTHUTHA,
UKUPHEPHA NOKUXHUMANISA UMPHAKATHI KWAZULU-
NATALI UMNUZ WILLIES MCHUNU EMCIMBINI WOKUVULA
IBHULOHO EDAYINGUBO EMVOTI MHLAKA 25 FEBRUARY
2014.**

Mphathi wohlelo;

Amakhosi aseNdlunkulu wonke akhona;

Amalungu esiShayamthetho;

IMeya yoMkhandlu waseMzinyathi, Cllr Mthethwa

Wonke amakhansela;

Izinduna nabamele imikhandlu yamakhosi;

Ubuholi bemboni yezokuthutha umphakathi;

Abezindaba;

Umphakathi wonke ngiyanibingelela.

Masibonge ukuthi njengoHulumeni walapha KwaZulu-Natal sikwazile ukuthola ithuba lokuhlanganyela nani mphakathi walapha eMvoti – sizokhuluma izindaba ezimnandi, zentuthuko.

Ukuza kwethu lapha namuhla kuyingxenye yokubungaza kukaHulumeni ekanye nabantu, iminyaka engamashumi amabili kwazuzwa inkululeko kanye nentando yabantu kulelizwe.

Kuyasijabulisa futhi ukuthi ezindaweni eziningi esizihambayo manje imiphakathi isiyakwazi ukuphumela obala ikhulume ngomehluko omkhulu osuwenziwe ezimpilweni zayo.

Kulezi zinsuku noMongameli wezwe, uJacob Gedleyi'hlekisa Zuma ugcizelela kakhulu ukuthi masiyikhulume siyimiphakathi le ndaba yokuthi ngempela impilo isishintshe kakhulu kunangaphambili kuka-1994.

Thina lapha KwaZulu-Natal nalapha eMvoti naseMsinga, kumele ukuthi sivumelane kakhulu noMsholozisi ngoba kule minyaka engu-20 edlule sibone izinguquko ezinkulu nesabe singakhulwa ukuthi ziyokwenzeka sisaphila.

Abantu basemakhaya ngaphansi kwaloHulumeni oholwa yi-ANC sebakhelwe izindlu, bakhelwa imitholampilo, bakhelwa izikole, bahlinzekwa ngamanzi ahlanzekile, bahlinzekwa ngogesi futhi bathola imigwaqo eyitiyela. Lo mehluko ongaka uhambisana nokudaleka kwamathuba emisebenzi nokuthuthukiswa kwentsha ngamakhono.

Ukugubha kwethu le minyaka engu-20 kwazuzwa inkululeko, kungenxa yokuthi uBaba uNelson Mandela, nalo Hulumeni bathatha isinqumo sokuthi abantu bahlinzekwe ngemali yesibonelelo ukuze ingabi bikho ingane elala ingadlile.

Siyazi ukuthi baningi abanye ababesigxeka ngale mali besho izinto ezahlukene.

Ngaphansi kwalo Hulumeni, ezweni lonke izingane ezingu-8 million zifunda mahhala futhi azikhokhi ngisho isenti ngoba imfundo iyona ephambili. Kulezi zingane iningi lazo elasezindaweni zasemakhaya njengakhona la eMvoti.

Ezweni lonke, izingane ezingu-9 million zithola ukudla okunempilo ezikoleni ngoba uHulumeni uyaqonda ukuthi imindeni ngokuhlukana kwayo ibhekene nosizi olungalingani.

Lokhu ngikubalula ngoba kumqoka ukuthi ngithi ngigxila kwingqikithi yalokhu esize ngakho la eMvoti kodwa siqonde ukuthi ukufika kwethu lapha, kuhambisana nomsebenzi omkhulu uHulumeni owenzile kule minyaka edlule, ukushintsha izimpilo zabantu.

Lo msebenzi awumile sisaqhubeka nawo futhi sizoqhubeka nokusebenzela abantu bakithi noma ngabe kuza ukhetho noma akukho khetho kodwa thina sizokwenza lokhu abantu abasithume khona.

UMengameli uZuma selokhu ethathe izintambo zokuphatha izwe, phakathi kokunye akubeke phezulu eqhulwini, wukuthuthukiswa kwengqalasizinda, yingakho nje ehhovisini lakhe kunophiko olubhekene nokuthuthukiswa kwengqalasizinda (Presidential Infrastructure Co-ordinating Forum).

Ngakho nathi wonke umsebenzi esiwenzayo kumele siwubike kuMengameli ngoba uyingxenye yalolu hlelo engikhuluma ngalo olubhekelele ukuthuthukiswa kwengqalasizinda, kusuka kwezokuthutha, ezamanzi, amachweba, ukuphehlwa kukagesi nokunye.

Siyazi ukuthi uMzinyathi ungenye yezindawo esifundazweni okuthe uma kungena uHulumeni wentando yeningi zahlonzwa njengezidinga kakhulu izidingo-ngqangi ngenxa yezinga lobubha nokuntuleka kwemisebenzi.

Esiyaye sikucele njengoHulumeni emiphakathini yakithi ngukuba isibekezelele. Siyazi phela ukuthi ngenxa yobukhulu besifundazwe nezindawo eziningi zasemakhaya ezisasilele emuva ngengqalasizinda yomgwaqo, kuyenzeka eminye imisebenzi ithathe isikhathi eside ukuba iqalwe noma iphothulwe emiphakathini yethu.

Ngakho-ke siyakudinga kakhulu ukubambisana phakathi komphakathi wala eMvoti noHulumeni, kubekhona ukusibekezelela lapho besingakafiki khona nezicelo zenu.

Kulesi khathi sikahulumeni wentando yabantu, akuseyona into ephusile ukungena emgwaqeni, nishise amathayi, nicekele phansi izakhiwo. Kumele, ikakhulukazi intsha yakithi ibe nokuxhumana nokwethembana phakathi kwayo noHulumeni ewuvotelayo.

Indlela enisingatha ngayo izindaba zentuthuko, iyona ezokhombisa ukuthi nizolihola kanjani izwe esikhathini esizayo.

Ebuholini bukaHulumeni waseKhaya, sihlale sikugcizelela ukuthi kumele kuqine ukubambisana phakathi kwethu njengoHulumeni wesifundazwe kanye nabo komasipala.

Kumele iphele lento esiyibona kwezinye izindawo lapho intuthuko ibanjezelwa ngukuthi amakhansela nabasebenzi boMasipala abathile abafuni ukubambisana nemiNyango kaHulumeni wesifundazwe ukuze kubhekwe ukuthi imiphakathi ingasizakala kanjani.

Abantu kumele baqonde ukuthi uHulumeni okhethwe ngentando yeningi waba semthethweni usuke sekungowakho noma ngabe awuholwa yiqembu lakho.

Angisayiphathi-ke eyokubangisana kwamakhansela ngaphakathi emkhandlwini kuze kuphazamiseke intuthuko abantu belibele ukubanga izikhundla.

Namhlanje sikhuluma ngentuthuko nomehluko omkhulu osuwenziwe kule ndawo ukwakha imigwaqo namabhuloho kule minyaka edlule. Imali eyisifake ezinhlelweni esizakha kule ndawo yaseMzinyathi ingu- R3.4 billion.

Lokhu kudale amathuba emisebenzi angaphezulu kuka-5058, kwaphinde kwahlomula osonkontileka abancane, noZibambe abangu-3 995.

Kule minyaka engu-20 edlule umNyango wezokuThutha kulesi sifundazwe wakhe amabhriji ezimoto angu-99, kwakhiwa awabahamba ngezinyawo angu-85 kwaphinde kwafakwa itiyela imigwaqo engamakhilomitha angu-1 275.

Namhlanje-ke singumNyango wezokuThutha egameni likaHulumeni waKwaZulu-Natali sithe masizohlolisa nina mphakathi walapha eDayingubo ngokuthi sidlulisele kunina ngokomthetho ibhuloho esesiqedile ukulakha.

Lo msebenzi sifake kuwona imali engu-R7.5 million. Siyafisa futhi ukubongela nalabo abakwazile ukuhlomula ngamathuba emisebenzi ngenkathi kuqhubeka umsebenzi wokwakha.

Sihlale sikugcizelela-ke futhi ukuthi la mathuba emisebenzi esikhuluma ngawo, yebo wona angawesikhashana kodwa ayalekelela ngokufundisa abantu bendawo amakhono abagcina sebekwazi ukuwasebenzisa uma befuna imisebenzi nakwezinye izindawo esikhathini esizayo.

Ngakho-ke nawo ayingxenye yokuthuthukisa imiphakathi ukuba ihlangabezane nezinhlelo zoguquko kwezomnotho esikhuluma ngalo kule minyaka engu-20 ezayo kulelizwe.

Leli bhuloho lizokwenza kube lula ukuxhumana phakathi kwezindawo zaseBhamshela, eDalton, eMatimatolo naseKranskop. Kuzosikala nabafundi bezikole njengeKwayibusele Primary naseMbiko Secondary.

Ngaphandle kwalo msebenzi esiwudlulisa ngokomthetho namhlanje, ikhona neminye imisebenzi eminingi okungashona ilanga uma siyibala esiyenzile kule minyaka edlule kule ngxenye yaseMvoti ngaphansi koMzinyathi.

Ngaphansi kohlelo lomNyango lokwakha imigwaqo engenela emiphakathini, esithi ama-access road, ukulungisa leyo esikhona siyifake kabusha inkwali kanye nemisebenzi emikhulu esithi ama-capital project kulo masipala waseMvoti sesisebenzise imali ebalelwa ku-R266 million kule minyaka emibili edlule nje kuphela.

Nakulona ka-2014/2015 esizongena kuwona uma kuqala u-April sesihlele ukuthi ngawo wodwa nje sizofaka imali ebalelwa ku-R100 million ukwenza le misebenzi.

Emigwaqeni emisha engama-access road esizoyakha singabala Okhalweni Local Road eMakhabeleni, uJikijiki ngaphansi kwamaBomvu noVungu ngaphansi kwaBathembu.

Ngaphambi kokuthi ngiphethe, ake ngithathe leli thuba ngigcizelele ukuthi njengoba sazi ukuthi uMengameli wamemezela umhlaka-07 May 2014 njengosuku lokhetho lukazwelonke nezifundazwe, sinxusa yonke imiphakathi ukuba ihloniphe umthetho ngesikhathi sokukhankasa.

Ukuzibophezela emgomweni wokuziphatha okwenziwa ngamaqembu ethu epolitiki ngesikhathi sokhetho, kumele sikubone kuthela izithelo emazingeni aphansi.

Akekho umuntu okumele aphoqe noma asabise omunye noma amphoqe ukuba aqoke iqembu elithile ngenkani ngalesi khathi sokhetho.

Ngakho-ke uma kukhona umuntu oniqhathayo odala ukuba nilwe anokwazi ukuthi lowo muntu yisigilamkhuba okumele nisibike kwabomthetho.

Umuntu owenza lokho kusho ukuthi akayifuni inqubekela phambili, futhi ulwisana nentando yeningi, ngakho kumele abhekane nabomthetho.

Angeke futhi siyishiye ngaphandle indaba yokubambisana ekulweni nobugebengu ikakhulukazi lobu obuthinta ukwebiwa kwemfuyo kulezi zindawo zalapha eMvoti naseMsinga.

Siyazi sonke ukuthi sesike sabona izibhicongo zokubulawa kwabantu eMahlaba, ePomeroy naseMuden, ngakho namanje kumqoka ukuba sikhuze ngoba izinto ezifana nalezi zisibuyisela emuva.

Ngonyaka odlule amaphoyisa acekele phansi izibhamu ezingu-17 000 lapha KwaZulu-Natal kuphela. Ezinye eziningi zezibhamu ezinkulu beziqhamuka khona kule ngxenye yesifundazwe, ngakho sinxusa bonke labo abanezibhamu ezingekho emthethweni ukuthi azikhishwe, zinikezwe amaphoyisa.

Kumqoka ukuba sisebenze ngokubambisana njengomphakathi, amaphoyisa, noHulumeni ukuze sibuyisela ubugebengu ezindaweni esihlala kuzo.

Sengathi ningahlalisana kahle, naziwe umhlaba wonke njengesizwe nendawo enokuthula nenhlonipho – niqhubeke nibambisane noHulumeni ukuze indawo yenu ithuthuke njalo iye phambili.

Ngiyabonga.